

**Sajak**

**Abizai**

**Dunia**

Kau begitu jelita  
dalam tatapan mata  
terlalu manis  
dengan cicipan lidah  
sungguh harum  
di deria cium.

Rengekanmu  
menjelmakan nada manja  
membuai ringan jiwa manusia  
seperti debunga mabuk asmara  
yang tak lagi menyedari  
musim bertukar kulit acap kali.

Nikmat dan lazat  
kauhidangkan penuh perisa  
sehingga melupakan sisa curiga  
pada tuba bahaya  
yang kaubancuhkan bersama.

Miri, Sarawak  
Oktober 2017

**Kuintip dan Kukutip**  
**(Buat SN MHS)**

Kuintip tingkahmu yang sederhana  
tidak pernah melebarkan diri  
dengan ilmu yang sarat di kepala  
atau gelaran sang pujangga  
yang berat dibawa.

Kukutip bicara  
pengumpul bijaksana  
di celah kias kata dan makna  
seorang pemburu seni pusaka  
yang jauh laluan kelananya  
si pintar puisi  
menghantar tamsil berharga

agar terus larut di sumur cinta  
seni bangsa nan tiada tara.

Miri, Sarawak  
September 2017

### **Tiada Dua di Getar Rasa**

Dia  
bukan hanya esa  
di dalam angka  
bukan cuma satu  
di hujung seru.

Dia  
harus tiada dua  
di getar rasa  
yang mendegupkan rindu  
di hidup kalbu  
menggetarkan cinta pertama  
dan selamanya  
tak pernah sirna  
dipadam kesementaraan masa.

Pujut 7, Miri  
September 2017

### **Biodata Penulis:**

#### **ABIZAI**

Nama sebenarnya Zainal Abidin Hj. Suhaili. Kelahiran Kuching, Sarawak pada 19 Disember 1966. Berkelulusan Ijazah Sarjana Muda Sastera dalam bidang Kesusasteraan Melayu dari Universiti Sains Malaysia. Kini bertugas sebagai Eksekutif Kewangan di sebuah syarikat swasta di Miri, Sarawak. Kumpulan puisi perseorangannya adalah *Seekor Kelawar di Kamar Pengantin* (GPPS, 1989), *Mengenal Yang Asal* (PUTERA, 2000), *Membentuk Elok di Teluk Esok* (DBP, 2001), *Sang Kelawar Kesiangan* (Citra kurnia Enterprise, 2010), *Sinar Benar* (DBP, 2011), *Kitab Rahsia* (ITBM, 2015), *Merdeka Burung* (ITBM, 2015), *Pemburu Kata Merdu* (ITBM, 2017) dan *Berani Bermimpi* (GAPENA, 2018). Beliau merupakan Ketua I Persatuan Penulis Utara Sarawak (PUTERA) sejak tahun 2002. Abizai adalah penerima Anugerah SEA Write 2017.